



**Sjúkratryggingar
Íslands**

Heilbrigðisráðuneytið
Skrifstofa innviða heilbrigðisþjónustu

Reykjavík, 26.10.2020

Efni: Umsögn Sjúkratrygginga Íslands (SÍ) vegna áforma um frumvarp til laga um breytingu á lögum um sjúklingatryggingu. Mál nr. 214/2020.

Vísað til ofangreindra áforma um frumvarp sem birt var í Samráðsgátt dags. 9.10.2020. Samkvæmt þeim upplýsingum sem þar koma fram er áformað að víkka tryggingavernd laga um sjúklingatryggingu nr. 111/2000 þannig að lögin nái með skýrum hætti til tjóns af völdum lyfja sem gefin eru við klínískar lyfjarannsóknir. Í núgildandi ákvæði 3. mgr. 3. gr. laganna felst að sjúklingatrygging bætir almennt ekki tjón sem rekja má til eiginleika lyfs, nema lyfið sé gefið á röngum forsendum. Þetta nýja ákvæði væri undantekning frá þessari meginreglu.

Af hálfu SÍ eru ekki gerðar athugasemdir við þessi áform. Þar sem málið snýst um að víkka gildi sjúklingatryggingar þannig að hún nái til eiginleika lyfja, er þó rétt að benda á að í íslenska löggjöf vantar almenna lyfjatryggingu sambærilega sjúklingatryggingunni. Slík löggjöf er t.d. í gildi í Danmörku og er rekin samhliða sjúklingatryggingu þar á landi.¹ Tryggingin tekur til sjaldgæfra og alvarlegra aukaverkana lyfja. Má benda á að í kafla 5.3. í frumvarpi því sem varð að núgildandi lögum um sjúklingatryggingu² kemur fram að ýmis rök mæli með því að samliða sjúklingatryggingu verði stofnað til lyfjatjónstrygginga hér á landi á sambærilegan hátt og í nágrannalöndunum. Rétt er að hafa í huga að ef upp koma atvik sem reynast bótaskyld getur þeim fylgt verulegt tjón og þar með kostnaður.

Að lokum vilja SÍ benda á að löngu er tímabært að hefja heildarendurskoðun laga um sjúklingatryggingu. Samkvæmt 22. gr. laganna, sem tóku gildi 1. janúar 2001, átti að endurskoða lögin innan fjögurra ára frá gildistöku þeirra. Sú endurskoðun hefur enn ekki farið fram.

Virðingarfyllst,

Berglind Ýr Karlsdóttir
deildarstjóri
Tryggingasvið Sjúkratrygginga Íslands

¹ Sjá umfjöllun á heimasíðu dönsku sjúklingatryggingarstofnunarinnar Patientskadeerstattingen: <https://pebl.dk/da/kan-du-faa-erstatning/hvad-er-en-skade/laegemiddelskader>.

² <https://www.althingi.is/altext/125/s/0836.html>.